

四庫全書

集部

欽定四庫全書

集部
晦庵集卷三
四

詳校官庶吉士臣朱理

主事臣呂雲棟覆勘

總校官庶吉士臣倉聖脉

校對官中書臣范來宗

謄錄監生臣李鳳丹

欽定四庫全書

晦庵集卷三

宋 朱子 撰

詩

奉同張敬夫城南二十詠

納湖

詩筒連畫卷坐看復行吟想像南湖水秋來幾許深

東渚

小山幽桂叢歲暮靄佳色花落洞庭波秋風渺何極

詠歸橋

綠漲平湖水朱欄跨小橋
舞雩千載事歷歷在今朝

船齋

考槃雖在陸滉漾水雲深
正爾滄洲趣難忘魏闕心

麗澤堂

堂後林陰密堂前湖水深
感君懷我意千里夢相尋

蘭澗

光風浮碧澗蘭杜日猗猗
竟歲無人采含薰祇自知

書樓

君家一編書不自圮上得石室寄林端時來玩幽蹟

山齋

藏書樓上頭讀書樓下屋懷哉千載心俯仰數椽足

蒙軒

先生湖海姿蒙養今自悶銘坐仰前賢點畫存豕繫

石瀨

疏此竹下渠漱彼澗中石暮館繞寒聲秋空動澄碧

卷雲亭

西山雲氣深，徙倚一舒歎。
浩蕩忽塞開，為君展遐眺。

柳堤

渚華初出水，堤樹亦成行。
吟罷天津句，薰風拂面涼。

月榭

月色三秋白，湖光四面平。
與君凌倒影，上下極空明。

濯清

涉江采芙蓉，十反心無數。
不遇無極翁，深衷竟誰識。

西嶼

朝吟東渚風夕弄西嶼月人境諒非遙湖山自幽絕

淙瑄谷

湖光湛不流嵌竇亦潛注倚杖忽淙瑄竹深無覓處

聽雨舫

綵舟停畫槳容與得欵眠夢破蓬窓雨寒聲動一川

梅堤

仙人冰雪姿貞秀絕倫擬驛使詎知聞尋香問煙水

采菱舟

湖平秋水碧桂棹木蘭舟一曲菱歌晚驚飛欲下鷗

南阜

高丘復層觀何日去登臨一目長空盡寒江列暮岑

次韻傅丈武夷道中五絕句

地久天長歲不留坐來念念失藏舟回看萬法皆兒戲
還直先生一笑不

分符擁節幾經年聞道方成屋數椽只恐未容高枕臥

却須持索聽鳴鞭

勲業今從鏡裏休
篋中空有敝貂裘
死灰那復飛揚意
惠許深慚不易酬

常記桐城十載前
幾回風雨對床眠
他年空憶今年事
却說黃亭共惘然

諸郎步武各駸駸
李子尤憐產萬金
鉢相傳自端的
老生無用與安心

題畫卷

丁亥

小山

飛來小坡坨未雨已滂瀟荒此定何人蘇公有遺記

吳畫

妙絕吳生筆飛揚信有神羣仙不愁思步步出風塵

卯硯

端溪有潛虬孕此金玉質混沌一竅開千年瀉寒液

鬼佛

冥濛罔象姿相好菩薩面鬼佛吾詎知水石詭奇變

范寬

山雄雲氣深樹老風霜勁下有考槃人超搖得真性

題祝生畫

裴侯愛畫老成癖歲晚倦遊家四壁隨身只有萬疊山
秘不示人私自惜俗人教看亦不識我獨摩娑三歎息
問君何處得此竒和璧隋珠未為敵答云衢州老祝翁
胸次自有陰陽功峙山融川取世界咳雲吐雨呼雷風
昨來邂逅衢城東定交斗酒歡無窮自言妙處容我識

為我埽此須臾中爾時聞名今識面回首十年齊掣電
裴侯已死我亦衰祇君雖老身猶健眼明骨輕鬚不變
筆下江山轉葱蒨為君多織機中練更約無事重相見
秀野以喜無多屋宇幸不礙雲山為韻賦詩熹
伏讀佳作率爾攀和韻劇思慳無復律呂笑覽
之餘賜以斤斧幸甚

高人山水心結習自無始五畝江上園清陰遍桃李一
堂聊自娛三徑亦可喜試問避俗翁何如尊賢里

溫公
獨樂

園在尊
賢里

門前車馬客無非朝大夫問君獨何事中歲遽此圖長

安二三公髮白形枯臞隱憂念名節亦有此樂無隱憂念名

節張大參
疏中語

君侯嗜圖史挿架何其多徒車三十乘流汗幾索駝千
載誰悟語端居自絃歌至哉天下樂歲月如子何

西山一何高雲氣出寒麓中有無事人鳴泉遶茅屋宴
坐今幾何無以媚幽獨興至偶成篇呼兒為余讀

我居深山中茅舍破不補上見風攪林下有雲承宇聞
公落新宮戶牖不可數懶惰心力衰念公亦良苦

夜吟招隱詩月落寒泉井自非千載人誰與共清景散
髮心朗寥凝神味淵永功名恐相期富貴非所幸

仙人空山居道意妙羣物度世君則然脩身吾豈不飛
行仰雲路跣坐探理窟獨夜扣星壇清齋具簪笏

青山背夕陽茲景公所愛虛堂日落時遷坐一解帶嵐
分疑有處鳥度知無礙須臾暮色來默默無與會

端居屏塵慮萬事付一尊客來語世故舉白當浮君起
搖謝衆甫嚙沓從諸孫何以自怡悅窓中見秋雲

清溪何迢迢上有千仞山山中學仙侶白石為門關丹
經苦吟哦至道窮躋攀豈知人間世風塵縈九寰

次劉秀野蔬食十三詩韻

乳餅

清朝薦蔬盤乳鉢有真味不用精瓊糜無勞爛羊胃

新笋

脩脩江上林白日暗風雨下有萬玉蚪三冬臥寒土

紫葷

誰將紫芝苗種此槎上土便學商山翁風餐謝肥疇

子薑

本草云薑久食去臭氣通神明
或云傷心氣不可多食者非是

薑云能損心此謗誰與雪請論去穢功神明看朝徹

茭筍

寒茭翳秋塘風葉自長短剗心一飽餘并得床敷軟

南芥

黃龍記昔遊園客有佳遺不謂洛生吟輟餐時擁鼻

焯菜

小草有貞性託根寒澗幽懦夫曾一噉感憤不能休

木耳

疏腸久自安異味非所誇樹耳黑垂聃登盤今亦乍

蘿蔔

紛敷剪翠叢津潤擢玉本寂寞病文園吟餘得深齷

芋魁

沃野無凶年正得蹲鴟力區種萬葉清深煨奉朝食

筍脯

南山春筍多萬里行枯腊不落盤餐中今知綠如簪

豆腐

世傳豆腐本
乃淮南王術

種豆苗稀力竭心已腐早知淮王術安坐獲泉布

日蕈

聞說閩風苑瓊田產玉芝不收雲表露烹淪詎相宜

伏讀秀野劉丈閒居十五詠謹次高韻率易拜

呈伏乞痛加繩削是所願望

秀野

為隣衡芷滿芳洲特地臨江賦遠遊十畝何妨自春色
萬緣從此付東流靜看朝市真兒戲須信田園是老謀
出處知公有餘裕未應辛苦謝靈丘

積芳圃

樂事從茲不易涯朱門還似野人家行看靚艷須携酒
坐對清陰只煮茶曉起蒼涼承墜露晚來光景亂蒸霞

平生結習今餘幾
試數毘那禩上花

家山堂

負米歸來手自舂
豈知門外有晴峯
羨公竟日塵氛遠
拄頰看山幽興濃
心鏡懸知不同調
詩壇那敢少爭鋒
空餘遠嶽尋師意
箇裏何妨為指蹤

拙政堂

驥足寧同曳尾龜
青山終是費心期
陶公歸去有餘樂
潘令閒居不足追
自笑十連非所慕
未應三徑苦無資

明朝謾擁朱輪去猿鶴咨嗟政爾為

香界

幽興年來莫與同滋蘭聊欲汎光風真成佛國香雲界
不數淮山桂樹叢花氣無邊曛欲醉靈氛一點靜還通
何須楚客紉秋佩坐臥經行住此中

春谷

武夷高處是蓬萊采得靈根手自栽地僻芳菲鎮長在
谷寒蜂蝶未全來紅裳似欲留人醉錦障何妨為客開

飲罷醒心何處所
遠山重疊翠成堆

舫齋

扁舟容與小房櫳
搖颺簾旌蜀錦紅
兩岸蒹葭秋色裏
一川煙浪夕陽中
不愁灑澗雙蓬鬢
未怯江湖萬里風
築室水中聊爾爾
何須極浦望朱宮

藥圃

種藥春畦有近功
不辭耘耔漫勞躬
漸看杞菊充庖下
即見芝英入籠中
病去自知非往日
身輕何必御冷風

出門會有兒童笑不是當年植杖翁

山人方丈

方丈翛然屋數椽
檻前流水自清漣
蒲團竹几通宵坐
掃地焚香白晝眠
地窄不容揮麈客
室空那有散花天
箇中有句無人薦
不是諸方五味禪

龜峯樓

楊柳東邊桂樹西
小樓晴眺極靈微
山川政爾供凝目
塵土何妨畧振衣
俯瞰桑田悲物化
閒披藥笈洞玄機

却疑欄外連穹石似厭支牀去不歸

月波臺

潺潺流水注回塘中作平臺受晚涼四面不通車馬跡
一尊聊飲芟荷香韓公無復吟花鳥楚客何勞賦葯房
少待須臾更清絕月華零露洗匡床

挽蔬圃

未覺閒來歲月頻荷鋤方喜土膏勻連畦已放瑤簪露
覆地行看玉本新小摘登盤先餉客晚炊當肉更宜人

却憐寂寞公儀子，拔盡園蔬不歎貧。

秋香徑

門外黃塵沒九達，坊中叢桂長膠枝。
三秋冷蕊從開落，終歲清陰不改移。
幽徑祇愁空翠滴，濃香一任晚風吹。
攀援却恨王孫遠，惆悵千林日暮時。

曲池軒

去年種竹長新篁，今歲穿渠過野塘。
自喜軒窓無俗韻，亦知草木有真香。
林間急雨生愁思，水面微風度晚涼。

却厭端居苦無事，凭欄閒理釣絲長。

前村○

題下恐當有梅字

玉立寒煙寂寞濱，仙姿瀟灑淨無塵。
千林搖落今如許，一樹橫斜獨可人。
真與雪霜娛晚景，任從桃柳殿殘春。
綠陰青子明年事，衆口驚嗟鼎味新。

秀野劉丈寄示南昌諸詩，和此兩篇。

滕王閣下水初生，閒道登臨復快晴。
帝子詎知陳迹在，長江肯越曲池平。
山楹雨罷珠簾捲，簷鐸風驚玉佩鳴。

滿眼悲涼今古恨人生辛苦竟何成

知向潮邊弄碧漪欄干三撫漾晴輝流傳妙語驚離閣
想像清游欲奮飛公去不應停驛騎我來直欲掛朝衣
南州高士何由見且看新荷出水稀

次秀野韻五首

史君蘆閣對脩筠起看名園雨後春便賦新詩留野客
更傾芳酒醉花神未酬管樂平生志且作羲皇向上人
祇恐功名相迫逐不容老子臥漳濱

滿園紅紫已爭新，百轉幽禽亦喚人。
蠟屐未妨泥步穩，珍叢終恨雨來頻。
臥看曉色忻初霽，起約良遊醉好春。
却笑當年金谷燕，相隨僕僕望車塵。

惆悵春餘幾日光，從今風雨莫顛狂。
急呼我輩穿花去，未覺詩情與道妨。
蘿帶不須吟杜若，角弓聊復賦甘棠。
淋浪坐客休辭醉，飲罷晞身向九陽。

知君久矣厭喧卑，造物尊前喚小兒。
一醕未應栽側弁，十分聊爾快翻卮。
浴中寂寞凝塵日，令尹憂勞退食時。

正好相尋發孤笑莫教牢落負心期

當年共翦北山萊脩竹成陰手自栽書卷莫教春色老
柴荆肯為俗人開公能顧我傳新句我欲留公撥舊醅
悵望南園芳樹底明年應放小車來

留秀野劉丈二首

好雨當春過一犁我公遠憶故園西孤蓬穩轉清灘急
十里行穿綠樹齊路熟已欣經霧市身輕未怕躡雲梯
諸孫刺欲留公住細和新詩巧指迷

一去屏山今幾春歸來三逕但荒榛
剪除便覺風烟好徙倚還驚物色新
樓外千林遮去路階前一水戀行塵
紛紛更作留連計同社追遊苦未頻

次秀野滄波館刈麥二詩

傳聞泛宅賀新成破月衝煙取次撐
鷁首斜飛寒浪急蓬窓側轉好山橫
知公興有江湖迴顧我詩無玉雪清
欲跨船舷還未敢幾時得伴鏡中行

急本
作息

貽年夙昔但聲歌今見郊園樂事多
且喜甌簞符善禱

未須蘆葍擲去去聲妖娥霞觴政自誇真一香鉢何煩問畢

羅我欲賣刀來學稼不知還許受屢麼小說有人中參毒夢紅裳娘子

悲歌有一丸蘆葍火吾宮之句

次秀野躬耕桑陌舊園之韻二首

郊園旱久只多蹊昨夜欣沾雨一犁已辦青鞋隨老圃
便驅黃犢過深溪農談刺喜鄉隣近饁具仍教婦子攜
指點竹寒沙碧處不知何似錦城西

丈人高致邈難干雲夢何如胸次寬老去未妨詩律在

人來只怕酒盃乾故開麥隴供家釀更有蘭章付客看
下走才慳囑和願公物色稍留殘

又和秀野二首

愁陰一夜轉和風曉看花枝露彩濃覓句休教長閉戶
出門聊得試扶筇物華始信如詩好春色方知似酒濃
多謝鄰翁笑相逐為言晴暖更過從

江臯晴日麗芳華翠竹疎疎映白沙路轉忽逢沽酒客
眼明惟見滿園花望中景助詩人趣物外春歸釋子家

向晚却尋芳草，遲夕陽流水，遶村斜。

次秀野詠雪韻三首

閉門高臥客來稀，起看天花滿院飛。
地迴杉篁增勝槩，庭虛鳥雀噪空饑。
酒腸凍澁成新恨，病骨侵凌減舊肥。
賴有袁生清興在，忍寒應未泣牛衣。

一夜同雲匝四山，曉來千里共漫漫。
不應琪樹猶含凍，翻笑楊花許耐寒。
乘興正須披鶴氅，淪甘猶喜破龍團。
無端酒思催吟筆，却恐長鯨吸海乾。

開門驚怪雪交加，亂落橫飛詎有涯。
密竹不妨呈勁節，早梅何處覓殘花。
山陰客子須乘興，洛下先生想臥家。
病廢盃觴寒至骨，哦詩無復更豪誇。

次韻雪後書事二首

晴煙裊裊弄晨炊，雪屋流澌未覺遲。
擬挈凍醪追勝踐，聊穿蠟屐過疎籬。
掃開折竹仍三逕，認得殘梅祇數枝。
不耐歲寒心事苦，滔滔欲說定從誰。

未覺春光到柳條，誰教飛絮倚風搖。
眼驚銀色迷千界，

夢斷彤庭散百寮
梅塢任從長笛弄
竹窓閒把短檠挑
何人剝啄傳清唱
更喜殘年樂事饒

次韻秀野早梅

可愛紅芳愛素芳
多情珍重老劉郎
踈英的礫尊中影
微月黃昏向裏香
胸次自憐真玉雪
人間何處有冰霜
巡簷說盡心期事
肯醉佳人錦瑟傍

次秀野極目亭韻

偶向新亭一破顏
高情直寄有無間
地偏已隔東西路

天濶長圍遠近山浩蕩祇愁春霧合輪囷却喜暮雲還
不堪景物撩人甚倒盡詩囊未許慳

又

坐看山花落幔顏不知身在翠雲間食寒到處雨復雨
客裏歸來山又山關孤燈間關無心棲鳥暮忘還
世情分逐流年去只有詩情老更慳

次秀野春晴山行紀物之句

祇憑詩律作生涯到處山林總是家便與清尊臥芳草

不妨皂蓋拂殘花側聞溫詔詢耆艾好趁春風入殿衙
回首能忘舊猿鶴一篇聊爾記年華

再用韻題翠壁

孤亭一目盡天涯俯瞰煙村八九家翠壁何年懸布水
綠陰經雨墮危花杖藜徙倚凝春望覓句淹留到晚衙
珍重詩翁莫相惱枯腸攪斷鬢絲華

次亭字韻詩呈秀野丈兼簡王宰三首

不駕朝車叩九扃獨攜靈壽向新亭人言洞裏春長在

自慶樽前老復丁魚樂波閒詩欲就鴻冥天濶酒初醒
晚來却向南堂坐珍重家山數點青

吏散庭空晝掩扃行春只到柳邊亭唱酬共喜摘鴻藻
來往何勞笑白丁一夕歌呼從自醉幾年燠暘為誰醒
定知細札褒揚後名入麟臺汗簡青

幾年寂寞掩柴扃抱膝長吟竹下亭不向參同論納甲
且將耘耔付添丁思玄賦罷驚遙舉止酒詩成恨獨醒
却笑春風兩蓬鬢飄蕭無復舊時青

次山行佳句呈秀野丈三首

幾日春陰瑣翠巖，忽驚飛蓋度晴嵐。
身輕似起烟霞瘡，意適寧論祿位貪。
句法舊超常語，六年華今富達尊。
三從容笑語無餘事，興在南山更向南。

几杖歸來覓故巖，眼中猶記舊烟嵐。
詩情自昔元無敵，世味而今更不貪。
默數流年欣望八，閑尋隱訣話存三。
小生自愧衰頹早，箇裏憑公為指南。

瞳瞳朝日出高巖，
藪藪征衣曳曉嵐。

闕

向來孤舊意

林泉老去覺真貪，淒涼烟火一百五零落交游十二三。
歎關 世事臥吹橫笛過溪南。

次秀野泛滄波館至赤石觀刈早稻韻

綠雲黃半武夷鄉，碧水紫紆一帶長。聞道放船飛皂蓋，
定知行酒載紅裳。權謳如賀豐年信，農家以早稻為晚禾信樂飲

閑酬此日涼禾黍，誰言不陽豔。晚炊流詠有餘香。

次秀野韻題臥雲庵

君家丘壑本圓成，何意尋荒入翠屏。為愛晴雲薦孤枕。

故將閑日付新亭夢魂寂寂衣裳冷心事悠悠簡策青
更把枯桐寫奇趣鷓鴣絃寒夜獨泠泠

奉和秀野見畱之句

閑臥秋山塵事稀西風催喚出巖扉來看甲第清泉好
更喜仙翁丹頰肥捫虱坐談端未厭連環入夢却思歸
明朝振策十峰頂滿袖瓊瑤背夕暉

次秀野種粟韻

阿香一笑走豐隆雨遍平疇萬頃中舊喜樊遲知學圃

今看許子快論功，遙憐鬱鬱翻秋隴。
預想垂垂弄晚風，珍重詩翁且彊健。
東阡南陌興無窮。

和秀野蘄簾之句

史君兩鬢尚青青，學道仍拋後院筵。
海暑快眠知簾好，晚涼徐覺喜詩成人。
從蘄水當年寄詩比韓公，此日清坐對更深。
誰是伴唯應闕月共長庚。

次韻寄題芙蓉館三首

亂山叢裏有江鄉，華館清波引興長。
正喜白鷗輕易狎

忽驚紅妓儼分行臨流更好揮椽筆俯檻何妨接羽觴
共說仙翁閑日月不因春草夢池塘

幻成飛閣笑談餘便有新荷水面鋪指點清波浮菡萏
驚呼紅影碎陬隅且將伴侶同盃酒不用君王子鏡湖
多少故交臺閣上問渠落拓更能無

不須艇子棹歌來且看芙蓉面面開卷裏有詩都錦繡
席間無地可塵埃風清月白琴三弄綠暗紅深酒一盃
明日仲宣樓上望越吟應是首頻回

次韻雪後書事二首

惆悵江頭幾樹梅，杖藜行遠去還來。
前時雪壓無尋處，昨夜月明依舊開。
折寄遙憐人似玉，相思應恨劫成灰。
沈吟日落寒鴉起，却望柴荆獨自回。

滿山殘雪對虛堂，想似當年輞口莊。
門掩不須垂鐵鎖，客來聊復共藜床。
故人聞道歌圍暖，妙語空傳醉墨香。
莫為姬姜厭憔悴，論文把酒話偏長。

和秀野韻二首

聞道無餘事，翛然百慮空。
何心分彼我，無地著窮通。
昨日青衿子，明朝白髮翁。
天機元自爾，不是故匆匆。

久矣安岑寂，山樓恨不深。
謾將門自掩，那有客相尋。
夙背迎朝景，加趺度夕陰。
感君傳秀句，把卷獨呻吟。

次秀野暑中二首

劇暑悲難度，清秋喜却回。
病隨庚伏盡，尊向晚涼開。
臨水看雲去，鉤簾待月來。
勝游驚昨夢，曾上鬱蕭臺。
熹新自雲

谷還家

絕境人難到唯堪樂此身
泉吟青玉峽風度白綸巾
獨往寧無意長閑未有因
雲山天賜履吾道豈全貧

雲谷絕頂

四望雲山
環數百里

次秀野雜詩韻

葺居二首

丈人高臥碧江頭
門掩西風萬木秋
重喜青山還遶屋
却嫌黃葉漸平溝
開軒且放浮嵐入
決水徐通廢圃流
便覺園林頓蕭爽
不妨隨境味玄幽

向來鞅掌元非病此日徜徉詎有妨
自喜登臺閒瘦竹人驚步屨響空廊
高齋雨過新山色曲沼風來舊水光
千里壯心殊未已不應踈懶興能長

刻漏

無疑莫詰君平肆任運休尋李王家
謾設銅壺候尺咫閒參玉表驗分差
不妨啓處知時節那更榮枯紀歲華
却羨昇平好官府日高三丈放朝衙

栗熟

樹雜倚桐繼國風莫教林下長蒿蓬

種樹法栗下不得有草木下共期

秋實充腸飽不羨春華轉眼空病起數升傳藥錄

本草云人

有脚弱往栗樹下啖及數升遂能起行

晨興三噉學仙翁

蘇黃門詩云老去自添腰脚病

山翁服栗舊傳方客來為說晨興晚三咽徐收白玉漿

櫻桃浪得銀絲薦一笑纔

堪發面紅

銀絲見杜詩本草云櫻桃服之令人美顏色

山藥

怪來朽壤耀瓊英小劇頃筐可代耕
豢豹於人儘無分
蹲鴟從此不須生
雪鏡但使身長健
石鼎何妨手自烹

欲賦玉延無好語，羞論蜂蜜與羊羹。

陳闌齋玉延賦有蜂蜜羊羹之句

食梨

珍寶渾疑露，結成香葩。况是雪儲精乍驚，磊落堆盤出。
旋剖輕盈，照骨明盧橘。謾勞誇夏熟，柘漿未許析。朝醒
啖餘更檢桐君錄。快果知非浪得名。本草謂梨為快果

導引

聞說牛刀久不更，閑中應接羨門生。向來已悟藏十界

呂公詩云一粒粟中藏世界

今日何勞倒五行

道書云五行顛倒術龍從火裏出按

躑有時聊戲劇居心無物轉虛明舉觴試問同亭侶九
轉工夫早晚成

假山焚香作烟雲掬水為瀑布二首

平地俄驚紫翠堆便應題作小飛來爐熏細度巖姿出
綫溜遙分壁色開獨往但憑南郭几遠游休翦北山萊
人言造化無私力珍重仙翁挽得回

一簣工夫莫坐談便教庭際擁千巖眼中水石今成趣
物外烟霞舊所耽泉細寒聲生夜壑香銷暝靄變晴嵐

兒童也識幽棲地共指南山更近南

家釀二首

銓艾無中熟懼謠闕屢豐但知愁鬢白那復醉顏紅
田舍寒如此侯家事不同新醅撥浮蟻春滿夜堂中

聞道兵厨盛春泉響臘蒟定知盈榼送不待扣門求
沉瀆應難比茅柴祗自羞病身從法縛好客為公留
熹近戒酒

故有法縛之句既作此詩而白衣已至賓朋已集可謂詩識矣一笑

酒市二首

聞說崇安市家家麴米春樓頭邀上客花底覓南隣詎
有當壚子應無折券人勸君渾莫問一酌便還醇

麗藻摘雲錦新章寫陟釐詩傳國風體興發酒家旗見
說難中聖遙知但啜醅盤殮雜鮭菜那有蟹螯持

黃雀鮓

黃雀飛鳴處交交異竊脂

桑扈竊脂蓋以不食穀得名

稻梁求易足

羅網去何遲味厚資偏嗜謀疎闕自為韓彭尚道醢么

麼爾誠宜

檳榔

憶昔南遊日初嘗面發紅藥囊知有用茗盃詎能同蠲疾收殊效修真錄異功三彭如不避糜爛七非中

本草云檳

榔殺三蟲柳子罵尸蟲云擊汝艷郊糜爛縱橫七非見真誥艷都者六天之一也

又五絕卒章戲簡及之主簿

暮年樂裏闕身切此外儵然百不貪意以載來緣下氣
檳榔收得為祛痰

錦文縷切勸加餐蜃炭扶留共一椀食罷有時求不得

英雄邂逅亦飢寒

向來試吏著南冠
馬甲蠓山得飫餐
却藉芳辛來解穢
雞心磊落看堆枰

箇中有味要君參
螫吻春喉久不甘
珍重人心亦如此
莫將寒苦換春酣

高士沈迷領薄書
有時紅糝綴玄須
定知不著金枰貯

兒女心情本自無

劉穆之初
仕為主簿

考異

詠歸橋

載事

一作載意

麗澤堂

相尋

一作難尋

題祝生畫

鬚不

一作鬚不

和秀野

無始

一作此始

徙居

一作徙車

茅屋

一作華屋

茅舍

一作茅屋

星壇

一作星躔

分疑

一作光宜

鳥度知無

一作風度却無

色來

一作新色

默默無

與

一作此意心默

端居

一作幽居

清溪何迢迢上

有千仞山
一作清江水悠
悠其上有羣山

吟哦
一作
吟誦

塵縈
一作
塵營

蘄筍

脩脩
一作
脩脩

拙政堂

咨嗟
一作
驚嗟

藥圃

杞菊
一作
枸杞

會有一
一作
會見

月波臺

潺潺
一作
濺濺

秋香徑

千林
一作
十秋

曲池軒

秋意
一作
秋思

風動
一作
風度

前村

真與

一作直與

晚景

一作晚興

驚嗟

一作驚嘆

秀野寄示南昌

直欲

一作真欲

次秀野韻

復賦

一作復和

共剪

一作去剪

留秀野

春過

一作春遇

遠憶

一作遠意

次秀野躬耕

隣共

一作隣近

下走

一作下筆

又和秀野

曉看

一作曉著

休教

一作誰教

過從

一作過逢

草逕

一作草路

次秀野詠雪韻

起看

一作起見

猶喜

一作聊喜

次亭字韻

勞笑

一作勞喚

次山行

憑公

一作憑君

晦庵集卷三

欽定四庫全書

晦庵集卷四

宋 朱子 撰

詩

答王無功在京思故園見鄉人問

王詩云旅泊多年歲忘去

不知迴忽逢門外客道發故鄉來歛眉俱握手
破涕共銜盃慙慙訪朋舊屈曲問童孩衰宗多

弟姪若箇賞池臺舊園今在否新樹也應栽柳
行疎密布茅齋寬窄裁經移何處竹別種幾株

梅渠當無絕水石計總生苔院果誰先熟林花
那後開羈心祇欲問為報不須猜行當驅下澤

去剪故

田萊

我從銅川來見子上京客問我故鄉事慰子羈旅色子
問我所知我對子應識朋遊總彊健童稚各長成華宗
盛文史連牆富池亭獨子園最古舊林間新坳柳行隨
堤關茅齋看地形竹從去年移梅是今年榮渠水經夏
簪石苔終歲青院果早晚熟林花先後明語罷相歎息
浩然起深情歸哉且五斗餉子東臯耕

送吳茂實

朝市令人昏山林使人傲誰知昏傲兩俱非但說山林

是高蹈

短句奉迎荆南幕府二首

雄藩荆楚地自古國西門客有籌邊略人知幕府尊時
平烽燧冷事省笑談溫宛洛何年向奇功要一論

軍府資長筭家山輟勝遊故人千里別歸騎兩年秋弔

古寧忘恨開尊且破愁相思欲回首但上曲江樓

張敬夫作

此樓熹
為之記

趙君澤携琴載酒見訪分韻得琴字

山城夜寥閭虛堂杳沉沉王孫有高趣挈榼來相尋喜
茲煩抱舒未覺杯酒深一為塵外想再撫丘中琴餘音
殷雷動爽籟悲龍吟寄謝箏笛耳寧知山水音

寄題瀏陽李氏遺經閣二首

老翁無物與孫兒樓上牙籤滿架垂更得南湖親囑付

歸來端的有餘師

南湖張敬
夫書院

讀書不見行間墨始識當年教外心箇是儂家真寶藏
不應猶羨滿籬金

題鄭德輝悠然堂

高人結屋亂雲邊
直面羣峰勢接連
車馬不來真避俗
簞瓢可樂便忘年
移筇綠幄成三徑
回首黃塵自一川
認得淵明千古意
南山經雨更蒼然

長溪林一鶚
秀才有落髮之願
示及諸賢詩卷
因題其後二首

聞說當機百念休
區區何更苦營求
早知名教無窮樂
陋巷簞瓢也自由

貧里煩君特地過金懶誰與換魚蓑他年雲水經行遍
佛法元來本不多

送德和弟歸婺源二首

十舍辛勤觸熱來琴書曾未拂塵埃秋風何事催歸興
步出閩山黃葉堆

十年寂寞抱遺經聖路悠悠不計程悞子南來却空去
但將迂濶話平生

仲縝尊兄對策南宮相顧田舍輒賦小詩攀餞

行李

三徑荒涼獨掩門，故人車馬過相存。
長安此去無千里，濁酒何妨盡一尊。
共說淵源非曩日，好披肝膽奉明恩。
不辭妄竊仁人號，執手臨岐敢贈言。

分水舖壁間讀趙仲縝畱題二十字戲續其後
水流無彼此，地勢有西東。
若識分時異，方知合處同。
觀者

請下一
轉語

次劉明遠宋子飛反招隱韻二首

先生留落歲時多氣湧如山不易磨却學幽人陶靖節
正緣三徑起絃歌

榮醜窮通祇偶然未妨閒共聳吟肩君能觸處真齊物
我亦平生不怨天

送謝周輔入廣

夫君壯節與奇謀屈首微官世所羞攬轡未妨聊矍鑠
賦詩直為寫離憂蒼茫嶺海三年別珍重親朋幾日留
滿意分攜一杯酒登山臨水不能休

和亦樂園韻

莫笑君家五畝園，要須胸次亦平寬。
坐間花柳陰初合，望外山河勢若蟠。
把酒儘誇雙鬢綠，擊鮮爭見兩輪丹。
隣翁未到心先識，更喜詩筒得細觀。

次韻謝劉仲行惠筍二首

誰寄寒林新劔筍，開奩喜見白差差。
知君調我酸寒甚，不是封侯食肉姿。

君詩高處古無師，島瘦郊寒詎足差。
縛得獐龍并寄我，

句中仍喜見雄姿

次李通韻贈范康侯

朝霜逼凋梅夕露忽團菊百年風雨過宜笑不宜哭
川失自防心兵幾回觸年來身老大甘此跨下辱永謝
五鼎烹聊寄一瓢足雖慙龍蟠泥肯羨鶯出谷適意超
混茫放情遺結束俯仰天壤間靜勝唯我獨蒼蒼有心
栢落落無瑕玉年紀尚無聞頭顱豈須卜

同張明府登凌風亭懷韓無咎

日夕和風至西山淡無姿危亭極遠眺勝處良在茲憶
昔韓令尹青雲乃心期鞿羈不得騁發此胸中奇前瞻
千仞岡俯視萬頃陂神襟一以曠我志浩渺瀾飛車越
滄浪天風振裳衣懷哉此焉薄問訊無邊辭今公豈不
佳宮商似前徽相攜岸晚幘共此長相思

次王宰立春日大雪韻

是身已分老菟裘肯為春回作許愁偶去尋芳朝信馬
却來踏雪夜驅牛鋪筵不見小垂手聯句空慚高結喉

更約桃花紅浪暖却陪履舄上蘭舟

再次王宰韻

相隨到處一羊裘况有澄江散客愁且看跳魚并集鳥
莫思去馬與來牛歡情往日空回首酒味今年不下喉
只待兩公高宴罷却攜茶鼎上漁舟

送張彥輔赴闕

執手何草草送君十里道君行入脩門披膽謁至尊問
君此去談何事袖有諫書三萬字明堂封禪不要論智

名勇功非所敦願言中興聖天子脩政攘夷從此始深
仁大義天與通農桑萬里長春風朝綱清夷軍律舉邊
屯不驚臥哮虎一朝決策向中原著鞭寧許他人先

天湖四乙丈坐間賞梅作送劉充甫平甫如豫
章

竹外橫枝老屈盤冰壺遙夜玉窓寒兩公明日江南路
雪後園林子細看

哭羅宗約二首

江閣論心地重來感慨多故人今已矣此道竟如何但
使窮新得終當訂舊訛詁言雖永隔吾欲問滄波

行義追前輩孤風凜一生子平婚嫁了元亮去留輕涪
萬無歸棹嚴揚有舊盟空令同社客生死痛交情

題米元暉畫

楚山直叢叢木落秋雲起向曉一登臺滄江日千里

觀劉氏山館壁間所畫四時景物各有深趣因

為六言一絕復以其句為題作五言四詠

絕壑雲浮冉冉層巖日影重重釋子巖中宴坐行人雪裏迷蹤

頭上山洩雲脚下雲迷樹不知春淺深但見雲來去
夕陽在西峰晚谷背南嶺煩鬱未渠央佇茲清夜景
清秋氣蕭瑟遙夜水崩奔自了巖中趣無人可共論
悲風號萬竅密雪變千林匹馬關山路誰知客子心

觀祝孝友畫卷為賦六言一絕復以其句為題
作五言四詠

春曉雲山烟樹炎天雨壑風林江閣月臨靜夜溪橋雪
擁寒襟

天邊雲繞山江上烟迷樹不向曉來看詎知重疊數
炎蒸無處逃亭午轉歎艷萬壑一奔傾千林共蕭瑟
草閣臨無地江空秋月寒亦知奇絕景未必要人看
茆屋無烟火溪橋絕徃還山翁獨乘興飄灑一襟寒
祝孝友作枕屏小景以霜餘茂樹名之因題此

詩

山寒夕飈急木落洞庭波幾疊雲屏好一生秋夢多

傅安道楊儀之二漕勸農有詩次韻二首

竝峙雙臺峻分馳四牡閒共欣膏脉潤未要粉泥乾詩
律何妨細歡情豈易闌新畝行可問載酒想同看

世味今如許吾生本自閒心期雖好在欲習未全乾錯
莫塵編暗棲遲壯節闌不因勲業晚清鏡亦頻看

感懷

經濟夙所尚隱淪非素期幾年霜露感白髮忽已垂鑿

井北山陟耕田南澗滑乾坤極浩蕩歲晚將何之

墨莊五詠

墨莊

詩書啓山林德義久儲積嗣世知有人新畬更開闢

冽軒

窓開深井泉窈窕千丈碧何幸且淵澄無勞遽心惻

靜春堂

幽人本何心偶此翳環堵隱几亦無言光風遍寰宇

玩易齋

竹几橫陳處韋編半掩時寥寥三古意此地有深期

君子亭

倚杖臨寒水披襟立晚風相逢數君子為我說廉翁

齋居感興二十首

余讀陳子昂感寓詩愛其詞旨幽邃音節豪
宕非當世詞人所及如丹砂空青金膏水碧
雖近乏世用而實物外難得自然之奇寶欲

效其體作十數篇顧以思致平凡筆力萎弱
竟不能就然亦恨其不精於理而自託於僂
佛之間以為高也齋居無事偶書所見得二
十篇雖不能探索微眇追迹前言然皆切於
日用之實故言亦近而易知既以自警且以
詔諸同志云

昆侖大無外旁薄下深廣陰陽無停機寒暑互來徃皇
犧古神聖妙契一俯仰不待窺馬圖人文已宣朗渾然

一理貫昭晰非象罔珍重無極翁為我重指掌

吾觀陰陽化升降八紘中前瞻既無始後際那有終至
理諒斯存萬世與今同誰言混沌死幻語驚盲聾

人心妙不測出入乘氣機凝冰亦焦火淵淪復天飛至
人秉元化動靜體無違珠藏澤自媚玉韞山含輝神光
燭九垓玄思徹萬微塵編今寥落歎息將安歸

靜觀靈臺妙萬物此從出云胡自蕪穢反受衆形役厚
味紛朶頤妍姿坐傾國崩奔不自悟馳驚靡終畢君看

穆天子萬里窮轍迹不有祈招詩徐方御宸極

涇舟膠楚澤周綱已陵夷况復王風降故宮忝離離玄
聖作春秋哀傷實在茲祥麟一以踣反袂空漣洏漂淪
又百年僭侯荷爵珪王風久已喪何復嗟嘆為馬公述
孔業託始有餘悲拳拳信忠厚無乃迷先幾

東京失其御刑臣弄天綱西園植姦穢五族沉忠良青
青千里草乘時起陸梁當塗轉凶悖炎精遂無光桓桓
左將軍仗鉞西南疆伏龍一奮躍鳳雛亦飛翔祀漢配

彼天出師驚四方天意竟莫回王圖不偏昌晉史自帝
魏後賢益更張世無魯連子千載徒悲傷

晉陽啓唐祚王明紹巢封垂統已如此繼體宜昏風塵
聚瀆天倫牝晨司禍凶乾綱一以墜天樞遂崇崇淫毒
穢宸極虐焰燔蒼穹向非狄張徒誰辦取日功云何歐
陽子秉筆迷至公唐經亂周紀凡例孰此容侃侃范太
史受說伊川翁春秋二三策萬古開羣蒙

朱光徧炎宇微陰眇重淵寒威閉九野陽德昭窮泉文

明昧謹獨昏迷有開先幾微諒難忽善端本綿綿掩身
事齋戒及此防未然閑闕息商旅絕彼柔道牽

微月墮西嶺爛然衆星光明河斜未落斗柄低復昂感
此南北極樞軸遙相當太一有常居仰瞻獨煌煌中天
照四國三辰環侍旁人心要如此寂感無邊方

放勳始欽明南面亦恭已大哉精一傳萬世立人紀猗
歟歎日躋穆穆歌敬止戒焚光武烈待旦起周禮恭惟
千載心秋月照寒水魯叟何嘗師刪述存聖軌

吾聞包犧氏爰初闢乾坤乾行配天德坤布協地文仰
觀玄渾周一息萬里奔俯察方儀靜隕然千古存悟彼
立象意契此入德門勤行當不息敬守思彌敦

大易圖象隱詩書簡編訛禮樂矧交喪春秋魚魯多瑤
琴空寶匣絃絕將如何興言理餘韻龍門有遺歌

程子
晚居

龍門
之南

顏生躬四勿曾子曰三省中庸首謹獨衣錦思尚絅偉
哉邠孟氏雄辨極馳騁操存一言要為爾挈裘領丹青

著明法今古垂煥炳何事千載餘無人踐斯境

元亨播羣品利貞固靈根非誠諒無有五性實斯存世人逞私見鑿智道彌昏豈若林居子幽探萬化原

飄飄學仙侶遺世在雲山盜啓元命秘竊當生死關金鼎蟠龍虎三年養神丹刀圭一入口白日生羽翰我欲徃從之脫屣謀非難但恐逆天道偷生詎能安

西方論緣業卑卑喻羣愚流傳世代久梯接凌空虛顧盼指心性名言超有無捷徑一以開靡然世爭趨號空

不踐實蹟彼榛棘途誰哉繼三聖為我焚其書

聖人司教化黷序育羣材因心有明訓善端得深培天
敘既昭陳人文亦褰開云何百代下學絕教養乖羣居
競葩藻爭先冠倫魁淳風反淪喪擾擾胡為哉

童蒙貴養正孫弟乃其方雞鳴咸盥櫛問訊謹暄涼奉
水勤播灑擁篲周室堂進趨極虔恭退息常端莊劬書
劇嗜炙見惡逾探湯庸言戒羸誕時行必安詳聖途雖
云遠發軔且勿忙十五志于學及時起高翔

哀哉牛山木斤斧日相尋豈無萌蘖在牛羊復來侵恭
惟皇上帝降此仁義心物欲互攻奪孤根孰能任反躬
良其背肅容正冠襟保養方自此何年秀穹林

玄天幽且默仲尼欲無言動植各生遂德容自清温彼
哉夸毘子咕躡徒啾喧但逞言辭好豈知神監昏曰余
昧前訓坐此枝葉繁發憤永刊落竒功收一原

卜居

卜居屏山下俯仰三十秋終然村墟近未愜心期幽近

聞西山西深谷開平疇
茆茨十數家清川可行舟
風俗頗淳朴曠土非難求
誓捐三徑資徃遂一壑謀
伐木南山巔結廬北山頭
耕田東溪岸濯足西溪流
朋來即共懽客去成孤遊
靜有山水樂而無身世憂
著書俟來哲補過希前脩
茲焉畢暮景何必營菟裘

游武夷以相期拾瑤草分韻賦詩得瑤字

秋風入庭戶殘暑不敢驕
起起汗漫期兩袖天風飄
春焉此家山名號列九霄
相與一來集曠然心朗寥
棲息

共雲屋追尋喚魚舫一水屢縈回十峰鬱岿峩蒼然大
隱屏林端聳孤標下有雲一壑仙人久相招授我黃素
書贈我英瓊瑤茅茨幾時見自此遺紛囂

石子重兄示詩留別次韻為謝三首

此道知君著意深不嫌枯淡苦難禁更須涵養鑽研力
彊矯無忘此日心

克己工夫日用間知君此意久晞顏
摛文妄意輸朋益何似書紳有訂頑

喜見薰成百里春更慙謙誨極諄諄願言勉盡精微蘊
風俗期君使再醇

鵝湖寺扣陸子壽

德義風流夙所欽別離三載更關心偶扶藜杖出寒谷
又枉籃輿度遠岑舊學商量加邃密新知培養轉深沉
却愁說到無言處不信人間有古今

奉陪機仲宗正景仁太史期會武夷而丈叔茂
實二友適自昭武來集相與泛舟九曲周覽巖

壑之勝而還機仲景仁唱酬迭作謂僕亦不可
以無言也衰病懶廢那復有此勉出數語以塞
嘉貺不足為外人道也

此山名自西京傳丹臺紫府天中天似聞雲鶴時降集
應笑磨螿空回旋我來適此秋景晏青楓葉赤搖寒烟
九還七返不易得十巖萬壑渠能專同遊幸有二三子
天畀此段非徒然梁郎季子山澤癯傅伯爰益瀛洲仙
相逢相得要彊附却恨馬腹勞長鞭黃華未和白雪句

盡舸且共清泠川回船罷酒三太息百歲誰復來通泉

景仁數日屢誦此句盈虛有數豈終極為君出此窮愁篇

奉答景仁老兄贈別之句

古人一去心不傳舉世誰復知其天奔趨嗜欲名利境
浩蕩勢若飄風旋嗟予慨此其已久矧復痼疾霾雲烟
禪闕夜扣手剝啄丹經晝誦心精專十年齊楚得失裏
醉醒夢覺今超然迷心昧性哂竺學貪生惜死悲方仙
如何懶惰行不力日月逝矣羲和鞭祗今已闕遠玄象

羨子正似方來川何憂功名與事業但要溥博而淵泉
不見君家鼻祖開聖學照耀今古書三篇

六經說命篇
始有學字

復用前韻敬別機仲

君家道素幾葉傳只今用舍懸諸天屹然砥柱戰河曲
肯似落葉隨風旋奮髯忽作蝟毛磔浩氣勃若霄中烟
隱憂尚喜遺直在壯烈未許前人專武夷連日聽奇語
令我兩腋風冷然初如茫茫出太極稍似冉冉隨羣仙
安能局促夜起舞下與祖遜爭雄鞭終憐賢屈惜往日

亦念聖孔悲祖川願君盡此一杯酒預澆古本如懸泉
沃心澤物吾有望勒移忍繼鍾山篇

讀機仲景仁別後詩語因及詩傳綱目復用前

韻

道有點識無言傳向來誤矣空談天只今斷簡窺蠹蝕
似向追蠹看蟲旋始知古人有妙處未遽秦谷隨飛烟
終然世累苦妨奪下帷發憤那容專一心正爾思鵠至
兩手欲救驚頭然書空且復罷咄咄屢舞豈暇陪仙仙

兩年罷詩止酒故云功名況復身外事我馬碑兀甘回鞭解頤果

值得水井

謂詩傳

鑒古亦會朝宗川

謂綱目

兩公知我不罪

我便可築室分林泉十年燈下一夜語閑日共賦春容
篇

讀通鑑紀事本末用武夷倡和元韻寄機仲

先生諫疏莫與傳忠憤激烈號旻天却憐廣文官舍冷
只與文字相周旋上書乞得聊自屏清坐日對銅爐烟
功名馳騫往莫悔鉛槧職業今當專要將報荅陛下聖

矯首北闕還潛然屬詞比事有深意憑愚護短驚羣仙

闕言未東太史筆自辛巳執留臺鞭

温公以畱臺領書局時韓魏公與書

有執鞭之語

果然勅遣六丁取香羅漆匣浮桐川陰凝有戒

竦皇鑒

恭聞上讀此書有履霜堅冰之語

陽剝欲盡生玄泉明年定對

白虎殿更誦大學中庸篇

頃在武夷宮講正心誠意

考異

短句奉迎荆南幕府

烽燧冷

一本作歌舞盛

次劉明遠反招隱韻

榮醜窮通

一作榮遇或窮

次韻贈范康侯

尚無

一作向無

次王宰立春日大雪韻

肯為春回作許愁

一作時去時來肯作

愁

去尋芳

一作向花城

來踏

雪

一作歸雲谷

觀劉氏山館畫

脚下

一作脚底

觀祝孝友畫

雪擁

一作雪滿

秋月

一作秋月

感懷

一作題佛跡壁

夙所

一作本所

霜露

一作風露

齋居感興

亦焦

一作更焦

盍更

一作合更

淫毒

一作

如何

一作奈何

鷺湖寺

更闕

一作轉闕

出寒谷

一作寄寒谷
一作過寒谷

却愁

一作抵愁


陪機仲泛舟九曲

似聞

一作但聞

讀機仲景仁別後詩

燈下
一作燈火



晦庵集卷四

欽定四庫全書

集部

晦庵集卷五

六

詳校官庶吉士臣朱理

主事臣呂雲棟覆勘

總校官庶吉士臣倉聖脉

校對官中書臣范來宗

謄錄監生臣李鳳丹

欽定四庫全書

晦菴集卷五

宋 朱子 撰

詩

拜張魏公墓下

衡山何巍巍，魏相流亦湯。湯我公獨何往，劍履在此堂。念昔中興初，孽豎倒冠裳。公時首建義，自此扶三綱。精忠貫宸極，孤憤摩穹蒼。元戎二十萬，一旦先啓行。西征奠梁益，南轅撫江湘。士心既豫附，國威亦張皇。縞素哭新

宮哀聲連萬方黠虜聞褫魄經營久徬徨玉帛驟往來
士馬且伏藏公謀適不用拱手遷南荒白首復來歸髮
短丹心長拳拳冀感格汲汲勤脩攘天命竟難謀人事
亦靡常悠然謝台鼎騎龍白雲鄉坐令此空山名與日
月彰千秋定軍壘岌業遙相望賤子來歲陰烈風振高
岡下馬九頓首撫膺淚淋浪山顏今幾年志士日慘傷
中原尚腥羶人類幾豺狼公還浩無期嗣德煒有光恭
惟宋社稷永永垂無疆

敬簡堂分韻得月字

煌煌定方中農隙孟冬月君侯敞齋扉華榜新未揭我
來適茲時亦有大夫茭清觴不留行晤語得超越更看
雷雨勢翻動龍蛇窟襟懷頓能輸肝膽亦已竭老仙來
何方湖海氣砒矸君侯斂袂起顛越承屨襪坐人驚創
見引去殊卒卒伊余不忍逝頓首願有謁人生均秉彜
天造豈停歇云何利害判所較無一髮茲焉辨不早大
本將恐蹙吾言實自歲君聽未宜忽

登嶽麓赫曦堂聯句

乾道丁亥冬九日

泛舟長沙渚振策湘山岑

晦翁

烟雲眇變化宇宙窮高

深懷古壯士志憂時君子心

敬夫

寄言塵中客莽蒼誰

能尋

晦翁

登定王臺

寂寞番君後光華帝子來十年餘故國萬事只空臺日
月東西見湖山表裏開從知與鳩樂莫作雍門哀

次敬夫登定王臺韻

今朝風日好抱病起登臺山色愁無盡江波去不回客
懷元老草節物又疎梅且莫催歸騎憑欄更一杯

七日發嶽麓道中尋梅不獲至十日遇雪作此
自此後係南嶽唱酬

三日山行風繞林天寒歲暮客愁深心期已悞梅花笑
急雪無端更滿襟

大雪馬上次敬夫韻

仙人喬嶽頂散髮吹參差喚我二三友集此西南垂列

筵命洛公侑坐迎江妃導之千羽旄投以萬壁璣繽紛
一何麗晻靄難具知衆真亦來翔恍覺叢霄低茫茫雲
霧合一一瓊瑤姿回首謝世人千載空相思吾衰怯雄
觀未敢探此竒短衣一匹馬一作乘匹馬幸甚得所隨天寒
飲我酒酒罷賡君詩人生易南北復此知何時

風雪未已決策登山用敬夫春風樓韻

披風蘭臺宮看雨百常觀安知此山雲對面隔霄漢群
陰匝寰區密雪渺天畔我我雪中山心眼悽欲斷吾人

愛奇賞遊發臨河歎我知
沍寒極見覘今當泮不須疑
吾言第請視明旦蠟屐得
鴈行籃輿或魚貫

十三日晨起霜晴前言果驗再用敬夫定王臺

韻賦詩

北渚無新夢南山有舊臺
端能成獨徃未肯遽空回
磴滑新經雪林深不見梅
急須乘霽色何必散銀杯

敬夫用熹定王臺韻賦詩因復次韻

新詩通造化催出火輪來
雲物低南極江山接漢臺
心

期千古迴懷抱一生開回首狂馳子紛紛政可哀

馬上口占次敬夫韻

幾日城中歌酒昏今朝匹馬向烟村迎人况有南山色
勝處何妨倒一尊

馬上舉韓退之話口占

昨日風烟接混茫今朝紫翠接青蒼此心元自通天地
可笑靈宮枉炷香

雪消溪漲山色尤可喜口占

頭上瓊岡出舊青馬邊流水漲寒汀若為留得晶熒住
突兀長看素錦屏

馬跡橋

下馬驅車過野橋橋西一路上雲霄我來自平生志
不用移文遠見招

登山有作次敬夫韻

晚峰雲散碧千尋落日衝飈霜氣深霽色登臨寒夜月
行藏只此驗天心

方廣道中半嶺小憇次敬夫韻

不用洪厓遠拍肩相將一笑俯寒烟
向來活計蓬蒿底浪說江湖極目天

道中景物甚勝吟賞不暇敬夫有詩因次其韻

穿林踏雪覓鐘聲景物逢迎步步新
隨處留情隨處樂未妨聊作苦吟人

崖邊積雪取食甚清次敬夫韻

落葉疎林射日光誰分殘雪許同嘗
平生願學程夫子

恍憶當年洗俗腸

後洞山口晚賦

日落千林外烟飛紫翠深寒泉添壑底積雪尚崖陰景
要吾人共詩留永夜吟從教廣長古莫盡此時心

後洞雪壓竹枝橫道

石灘聯騎雪垂垂已把南山入小詩後洞今朝逢折竹
却思聯騎石灘時

方廣奉懷定叟

偶來石廩峰頭寺，忽憶畫船齋裏人。
城市山林雖一致，不知何處是真身。

方廣聖燈次敬夫韻

神燈照夜惟聞說，皓月當空不用尋。
箇裏忘言真所得，便應從此正人心。

羅漢果次敬夫韻

目勞足倦登喬嶽，叻燥腸枯到上方。
從遣山僧煮羅漢，未妨分我一杯湯。

壁間古畫精絕未聞有賞音者

老木樛枝入太陰
蒼岷寒水斷追尋
千年粉壁塵埃底
應識良工獨苦心

方廣版屋

秀木千章倒層甍
萬瓦差悄無人似
玉空詠小戎詩

泉聲次林擇之韻

空巖寒水自悲吟
遙夜何人為賞音
此日團欒都聽得
他時離索試追尋

霜月次擇之韻

蓮花峰頂雪晴天
虛閣霜清絕縷烟
明發定知花藪藪
如今且看竹娟娟

枯木次擇之韻

百年蟠木老聱牙
偃蹇春風不肯花
人道心情頑似汝
不須持向我儂誇

夜宿方廣聞長老守榮化去敬夫感而賦詩因

次其韻

拈椎豎拂事非真用力端須日日新只麼虛空打筋斗
思君辜負百年身

蓮花峰次敬夫韻

月曉風清墮白蓮世間無物敢爭妍如何今夜峰頭雪
撩得新詩續舊篇

奉題張敬夫春風樓

乾道丁亥冬至

隆堂謹前規傑閣聳奇觀憑欄俯江山極目眇雲漢
人沂上翁顧肯吟澤畔俛仰一喟然冲融無間斷我來

抑何幸屢此承晤歎平生滯吝曾若若層冰泮繼今兩
切切保合勤旦旦萬事儘紛綸吾道一以貫

方廣睡覺次敬夫韻

風簷雪屋澹無情巧作寒窓靜夜聲倦枕覺來聽不斷
相看渾欲不勝清

感尚子平事

翩然遠嶽恣游行慨想當年尚子平我亦近來知損益
只將懲窒度餘生

殘雪未消次擇之韻

脚底悲風舞凍鴉此行真是躡蒼霞仰頭若木敷瓊藥
不是人間玉樹花

自方廣過高臺次敬夫韻

素雪留清壁蒼霞對赤城我來陰壑晚人說夜燈明貝
葉無新得蒲人有舊盟咄哉寧負汝安敢負吾生

清疑當作

青

石廩峰次敬夫韻

七十二峰都插天一峰石廩舊名傳家家有廩高如許
大好人間快活年

行林間幾三十里寒甚道傍有殘火溫酒舉白
方覺有暖意次敬夫韻

千林一路雪毡堆吟斷飢腸第幾回溫酒正思敲石火
偶逢寒燼得傾杯

林間殘雪時落鏘然有聲

青鞋布襪踏瓊瑤十里晴林未覺遙忽復空枝墮殘雪

恍疑鳴瓊落叢霄

至上封用擇之韻

疇昔朱陵洞如今白帝城
天高雲共色夜永月同明
萬里爭回巧十峰盡乞盟
登臨須我輩更約羨門生

福巖寺回望嶽市

昨夜相攜看霜月今朝誰料起寒烟
安知明日十峰頂不見人間萬里天

福巖讀張湖南舊詩

樓上低回摻別袖山中磊落見英姿白雲未屬分符客
已有經行到處詩

登祝融峯用擇之韻

今年緣底事浪走太無端直以心期遠非貪眼界寬雲
山於此盡風袂不勝寒孤鳥知人意茫茫去不還

穹林閣讀張湖南七月十五夜詩詠歎久之因
次其韻

南嶽天下鎮祝融最高峰仰千幾千仞俯入一萬重開

闕知何年上有釋梵宮
白日照雪屋清宵響霜鏞
極知瓌特觀仙聖情所鍾
雲根有隱訣讀罷凌長風

晚霞

日落西南第幾峰
斷霞千里抹殘紅
上方傑閣凭欄處
欲盡餘暉怯晚風

過高臺携信老詩集
夜讀上封方丈次敬夫韻
十年間說信無言
草草相逢又黯然
借得新詩連夜讀
要從苦淡識清妍

贈上封長老

夜宿上封寺，翛然塵慮清。
月明殘雪裏，泉溜隔窓楮。
衲今如許，緋袍那復情。
爐紅虛室暖，聊得話平生。

自上封登祝融峯絕頂次敬夫韻

衡嶽十仞起，祝融一峯高。
羣山畏突兀，犇走如曹逃。
我來雪月中，歷覽快所遭。
捫天滑青壁，俯壑崩銀濤。
所恨無十牯，一掣了六鼇。
遙歸青蓮宮，坐對白玉毫。
重閣一徙倚，霜風利如刀。
平生山水心，真作貨食餐。
明朝更清

澈再往豈憚勞中宵撫世故劇如千蝟毛嬉遊亦何益
歲月今滔滔起望東北雲茫然首空搔

十五日再登祝融用臺字韻

江流圍玉帶天影抱瓊臺杖烟霄外中巖日月回箕
山藏道許吳市隱仙梅一笑今何在相期再舉杯

胡丈廣仲與范伯崇自嶽市來同登絕頂舉酒
極談得聞比日講論之樂

我已中峯住君從何處來莫留巖底寺徑上月邊臺濁

酒圍樂坐高談次第開前賢渺安在清酌寄餘哀

醉下祝融峯作

我來萬里駕長風絕壑層雲許盪胸濁酒三杯豪氣發
朗吟飛下祝融峯

十六日下山各賦一篇仍迭前韻

絕頂來還晚寒窓睡達明連床眇歸思三宿悵餘情雲
合山無路風回雪有聲巖祇珍重意只此是將迎

和敬夫韻

蠟屐風煙隨處別下山人事一番新世間不但山中好
今日方知此意真

扣擇之韻

仰止平生舊今年得得來舉頭天一握倚杖雪千堆講
道心如渴哦詩思湧雷出山遺語在歸騎莫徘徊

二詩奉酬敬夫贈言并以為別

我行二千里訪子南山陰不憂天風寒况憚湘水深辭
家仲秋旦稅駕九月初問此為何時嚴冬歲云徂勞君

步玉趾送我登南山南山高不極雪深路漫漫泥行復
幾程今夕宿櫛洲明當分背去惆悵不得留誦君贈我
詩三歎增綢繆厚意不敢忘為君商聲謳

昔我抱冰炭從君識乾坤始知太極蘊要眇難名論謂
有寧有跡謂無復何存惟應酬酢處特達見本根萬化
自此流十聖同茲源曠然遠莫禦惕若初不繁云何學
力微未勝物欲昏涓涓始欲達已被黃流吞豈知一寸
膠救此千丈渾勉哉共無斃此語期相敦

讀林擇之二詩有感

自此後係東歸亂槩

筍輿隨望入寒烟
每誦君詩輒黯然
今夜定知連榻夢
一時飛墮錫山前

竹輿傲兀聽嘔啞
合眼歸心已到家
遊子上堂慈母笑
豈知行李尚天涯

馬上贈林擇之

與君歸思渺悠哉
馬上看山首共回
認取山中奇絕處
他年無事要重來

梅溪陂下作

野牛浮鼻過寒溪
落木前椽水下陂
俗手定應摹不得
無人說與范牛知

寄題李東老淵乎齋

東老幽棲地淵乎亦妙哉
空山無客到流水有花開
句律今誰敵詩仙舊所陪
朱絃悄餘韻綺席澹浮埃
竟日門多掩長沙歲一來
端能負猿鶴歸計莫徘徊

宿梅溪胡氏客館觀壁間題詩自警二絕

貪生莖豆不知羞
覩面重來躡俊遊
莫向清流浣衣袂
恐君衣袂浣清流

十年湖海一身輕
歸對藜渦却有情
世路無如人欲險
幾人到此誤平生

擇之所和生字韻語極警切次韻謝之
兼呈伯崇

不是譏訶語太輕
題詩只要警言流
情煩君屬和增危惕
虎尾春冰寄此生

再答擇之

兢惕如君不自輕世紛何處得闕情也應妙敬無窮意
雪未消時草已生

十一月二十六日宿革鄉西三十餘里黃花渡
口客舍稍明潔有宋亨伯題詩亦頗不俗因錄
而和之

鼎足爐邊坐陶然共一搏道心元自勝世味不須論安
穩三更睡清明一氣存雖無康樂句聊爾慰營魂

二十七日過毛山鋪壁間題詩者皆言有毛女
洞在山絕頂問之驛吏云狐魁所為耳因作此

詩

人言毛女住青冥散髮吹蕭夜夜聲却是郵童解端的
向儂說是野狐精

次擇之韻聊紀秦事

不知四海已湯湯舞殿歌臺樂未央五帝威神等牛馬
六王子女盡嬪媵仙心久已攀姑射辨口從教泣華陽

行客詎明千古意
虛疑霞佩響琳琅

雪梅二闋奉懷敬夫

二闋合次樂府以有
後詩仍舊編附此

雲垂幕陰風慘淡
天花落天花落千林瓊玖
一空鸞鶴
征車渺渺穿華薄
路迷迷路增離索
增離索剡溪山
水碧湘樓閣

梅花發寒梢掛著
瑤臺月瑤臺月和羹
心事履霜時節
野橋流水聲鳴咽
行人立馬空愁絕
空愁絕為誰凝
佇為誰攀折

題二闕後自是不復作矣

久惡繁哇混太和云何今日自吟哦
世間萬事皆如此
兩葉行將用斧柯

次韻擇之聽話

語道深慚話一場感君親切為宣揚
更將充擴隨鉤索
意味從今積漸長

次韻伯崇自警二首

十載相期事業新云何猶歎未成身
流光易失如翻水

莫是因循誤得人

誦君佳句極優柔未得明彊是所憂若悟本來非木石
保君弘毅不能休

奉答擇之四詩意到即書不及次韻

為閔人疲上馬行此時消息儘分明更憐跣足無衣苦
充此直教天下平

君看灞橋風雪中南來北去莽何窮想應亦有還家客
使爾譏訶恐未公

東頭不見西頭是南畔唯嫌北畔非多謝聖門傳大學
直將絜矩露天機

安肆真同鴆毒科君言雖苦未傷和解嘲却是生回互
政恐紛紛事轉多

荅擇之

長言三復儘溫純妙處知君又日新我亦平生傷褊迫
期君苦口却諄諄

次韻擇之見路傍亂草有感

世間無處不陽春
道路何曾困得人
若向此中生厭斁
不知何處可安身

到袁州二首

馬蹄今日到袁州
山木蕭條四面愁
多謝晚來風力勁
朔雲寒日共悠悠

袁州刺史幾何人
韓李流芳獨未泯
道喪時危今日意
九原遺恨一時新

十二月旦袁州道中作

今朝已是臘嘉平我獨何為在遠行白髮倚閭應注想
青山聯騎若為情

同林擇之范伯宗歸自湖南袁州道中多奇峰
秀木怪石清泉請人賦一篇

我行宜春野四顧多奇山攢巒不可數峭絕誰能攀上
有青葱木下有清冷灣更憐灣頭石一一神所剗衆目
共遺棄千秋保堅頑我獨抱孤賞喟然起長歎

賦歸雲洞

人生信多患吾道初不窮云何感慨士伏死堪巖中宜
陽古道周竅石何嵌空窮幽歷肺腑履坦開房櫳頗疑
有畸人往昔寄此宮歲月詎云幾井竈無遺蹤我來記
清秋歸塗渺窮冬興懷重幽討永嘯回長風風回雲氣
歸洞口春濛濛信美非人境出門吾欲東

人言石乳洪羊之勝不及徃遊作此

人道歸雲未足誇洪羊石乳更硤砢連環入夢難紆軫
回首西風又日斜

分宜晚泊江亭望南山之勝絕江往遊將還而
舟子不至擇之刺船徑渡呼之予與伯崇佇立
以俟因得二絕

寒水粼粼受晚風輕舸來往思無窮何妨也向溪南去
徙倚空林暮靄中

一棹翩然喚不回兩筇江畔久徘徊早知君有如神技
同下中流亦快哉

新喻西境

北嶺蒼茫雨欲來
南山騰躡翠成堆
樺杉繞麓千旗卷
野水涵空一鑑開
客路情懷元倥傯
今晨遊眺却徘徊
自然觸目成佳句
雲錦無勞更剪裁

道間厭苦泥淖思
亟還家安坐講習
用擇之韻
呈二賢友

客路泥塗正所憂
可堪雲物更油油
向來結友輕千里
此去還家且一丘
妙處自應從我得
躬行肯使歎吾猶
兩賢定許相提挈
厚意何勝雜珮酬

再和油字韻

楚山黃落正離憂
喜見寒杉卷碧油
倦客今年真白髮
羽人何日定丹丘
奇兵捷出吾當避
狹路爭先子不猶
箇裏竟能無一語
應慙二鳥起相酬

次韻擇之懷張敬夫

往時聯騎向衡山
同賦新詩各據鞍
此夜相思一杯酒
回頭猶記雪漫漫

別韻賦一篇

踏雪凌霜眼界新
舉鞭遙指玉嶙峋
回頭此日成千里
橫槩思君少一人

宿新喻驛夜聞風鐸

倦枕欹眠到五更
却嫌風鐸久悲鳴
恍疑締絡南鄰夜
寒鐵丁東客夢驚

題野人家

茆簷竹落野人家
只麼悠悠閱歲華
田父把犁寒雨足
牧兒吹笛晚風斜

題萬安野館

身似孤雲去復還
投裝猶記此窗間
只應烟雨蒼茫外
即是當時萬疊山

萬安遇長沙便欲附書不果

長沙一別兩悠悠
夢想清湘帶橘洲
欲寄行人數行字
行人不作置書郵

不見梅再用來字韻

舊歲將除新歲來
梅花長是雪毳堆
如何此日三洲路

不見寒葩一樹開
野水風烟迷慘澹
故園霜月想徘徊
夜窓却恐勞幽夢
連把新書取次裁

賦水僊花

隆冬凋百卉
江梅厲孤芳
如何蓮艾底
亦有春風香
紛敷翠羽帔
溫艷白玉相
黃冠表獨立
淡然水僊裝
弱植愧蘭蓀
高操推冰霜
湘君謝遺楫
漢水羞捐璫
嗟彼世俗人
欲火焚衷腸
徒知慕佳冶
詎識懷貞剛
淒涼栢舟誓
惻愴終風
章卓哉有遺烈
千載不可忘

清江道中見梅

今日清江路寒梅第一枝
不愁風嫋嫋正奈雪垂垂
煖唯須酒平章却要詩
他年十里夢誰與寄相思

臨江買舟

征驂聊駐近江樓
南市津頭問買舟
共說明朝乘雪水
長歌一日到洪州

榔林

東臯澣寒水西崦饒清陰
南埭奎壁麗北垞靜且深入

門流綠波竹樹何筍樛積石象雲壑高堂杳沉沉左通
雲水區右徑梅杏林沼沚共回薄觀臺鬱差參紛吾十
里遊發軔南山岑過門得嘉賞慰此夙昔心紆懷企疏
翁歲晚投冠簪婆娑此澗谷俯仰成古今嗣德世有人
聞道我所欽相見無雜語晤言寫胸襟懷舊復惆悵命
酒聊同斟飲罷我當去握手清江潯

冠簪一作華簪

過樟木鎮晚晴二首

朝晴遣我看獅林頃刻浮雲萬里陰拂袖凌風二十里

依然寒日照長吟

飛雲極目疑梅嶺落日回頭夢橘洲從此不愁東路永
祇應西望轉悠悠

赤岡頭望遠山作

曉起清江弄小舟晚風吹過赤岡頭遠峰自作修眉斂
萬里那知客子愁

次韻擇之發臨江

千里烟波一葉舟三年已是兩經由今宵又過豐城縣

依舊長江直北流

次韻擇之漫成

落日晴江更遠山
遠山猶在有無間
不須極目傷懷抱

且看漁船近往還

船一本
作舫

竹節灘

船下清江竹節灘
長烟漠漠水漫漫
人家斷岸斜陽好
客子中流薄暮寒

舟中晚賦

長風一萬里披豁暮雲空極浦三年夢扁舟二子同離
離浮遠樹杳杳沒孤鴻若問明朝事西山掩靄中

次韻擇之將近豐城有作

老矣身如萬斛舟長風破浪若為收江山若有逢迎意
到處何妨為少留

過豐城作

渺渺豐城縣回頭憶舊遊晴江羅遠樹宿莽亂中洲寶
劍今鱗甲神光尚斗牛他年還記得此夜一扁舟

舟中見新月伯崇擇之二友皆已醉卧以此戲
之

舟中見新月烟浪不勝寒與問醉眠客豈知行路難殘
陽猶水面孤鴈更雲端蓬底今宵意天邊芳歲闌

次韻擇之舟中有作二首

一江煙水浩漫漫昨夜扁舟寄此間共向船頭望南北
不知何處是家山

一席三人抵項眠心知篷外水如天起來却怪天如水

月落烏啼浦樹邊

自東湖至列岫得二小詩

孺子高風何處尋
東湖臺觀水雲深
生芻一束人如玉
此日淒涼萬古心

昨日來時萬里陰
長江雪後玉十岑
蒼茫不盡登臨意
重對晴天豁晚襟

列岫望西山最正殆無毫髮遺恨
滕王秋屏皆不及也因作此詩二首

城中望西山拄頰朝空暮不到列岫亭詎知親切處
東西水平分南北山中判妙處毫髮間商略無遺算

晚飲列岫

危亭披豁對蒼霞策杖重來日未斜滿目江山一尊酒
哦詩莫遣大雄誇

觀上藍賢老所藏張魏公手帖次王嘉叟韻

火風吹散旱天雲膚寸空餘翰墨新拭淚相看渺今古
堂堂那復有斯人

次韻伯崇登滕王閣感舊蓋聞往時延閣公拜
疏於此云

金闕銀臺夢想中樓前拜舞卓囊空十年殄瘁無窮恨
歎息今人少古風

觀西山懷嶽麓以為莫能相上下也聊賦此云
風月平生意江湖自在身年華供轉徙眼界得清新試
問西山雨何如湘水春悠然一長嘯妙絕兩無倫

進賢道中

往辭湘水曲今過豫章城改歲無多日到家才幾程畫
憐春意迫夜喜月華清此去無淹軌前途似掌平

野望

登高立馬瞰晴川四面平林接暝烟東望不堪頻極目
歸心已度鳥飛前

次韻擇之進賢道中漫成五首

白酒頻斟當啜茶何妨一醉野人家據鞍又向岡頭望
落日天風鴈字斜

笑指斜陽天外山無端長作翠眉攢豈知男子桑蓬志
萬里東西不作難

夜宿林岡月滿川歸期屈指正茫然也知地脉無羸縮
只把陰晴更問天

誰作窓間擁鼻聲更哦樂府短歌行從教永夜清無寐
只恐晨雞不肯鳴

日暮重岡上人勞馬亦饑不妨隨野雀容易宿寒枝

次韻擇之夜宿進賢客舍

白日照寒野，
紈然十里平。
馳暉一以沒，
浩蕩驚颺生。
露彩林表見，
月華波上明。
同行魯狂士，
忽發商歌聲。
洗耳金石奏，
信知塵累輕。

次韻擇之潤陂有作

我行欲安適，
莽莽窮山陂。
晨裝遠林表，
午憩通川湄。
曠望想慈親，
行役嗟吾兒。
喟然陟屺歎，
歸心浩無涯。
曉霜徒御寒，
莫雨朋儔悲。
前期諒非遠，
無為苦愁思。

過潤陂日晴意可喜至暮復雨伯宗有詩因次

其韻

客裏歲云暮我心殊未平
悠悠惜往日鬱鬱懷平生
况復久陰雨喜茲霜曉明
那知不終日又作瀟瀟聲
坐厭泥塗辱空嗟鴻鴈輕

山行兩日至金步復見平川
行夷路計程七日
可到家矣

行穿側徑度荒山又踏深泥過野田
路轉忽然開遠望
眼明復此見平川江烟浦樹悲重疊
楚水閩山喜接連

執駕有期心轉迫
稜稜瘦馬不勝鞭

次韻擇之金步喜見大江有作

江頭四望遠峰稠
江水中間自在流
並岸東行三百里

水源窮處即吾州

此江發源分水嶺故前詩有楚水閩山喜接連之句

次韻擇之餘干道中

寒盡春生草又青
化工消息幾曾停
因君一詠陵陂麥

恍憶儂家老圃亭

亭下予家種麥處也

安仁曉行

夙駕安仁道行行得自娛
荒山園野濶遠樹出林孤
景晦長烟合天寒碧草枯
歸心懷徃路極日向平蕪

十七日早霜晴觀日出霧中喜而成詩

斜月夜窓白肅霜朝氣清
長塗披素錦寒霧湧金鉦
已作三冬雨何妨十日晴
天公且相念莫遣暮雲生

再用前韻

久陰冬竟暖欲霽氣先清
田舍占烟火軍家候鼓鉦
風霜十里肅天地一朝晴
明日知何日陽春又發生

次韻擇之過了頭巖

四面晴岡紫石崖如何渾作白皚皚
須知暖入陰泉溜不是寒封積雪堆

章巖

豁爾天開宇呀然夜不扃
閒雲任棲宿密雨斷飄零
破屋僧常住高軒客屢經
古今題寫處一半辭文青

次韻擇之章巖

驅馬倦長道投鞭憇此巖
來應六鼇戴跡是五丁劔泉

脉流青潤林梢擁碧巉老禪深閉戶客子且征衫

鉛山立春六言二首

雪擁山腰洞口春迴楚尾吳頭欲問闌天何處明朝嶺

水南流

行盡風林雪徑依然水館山村却是春風有脚今朝先

到柴門

次二友石井之作三首

一竇陰風萬斛泉新秋曾此弄清漣人言湛碧深無底

只恐潛通小有天

聯騎君登泉上亭黃塵雙眼想增明
籃輿獨向溪南路
惆悵不成同隊行

泉嵌側畔一川明水石縈迴更有情
聞說近來疏葺好
想應仍是舊溪聲

次韻擇之鉛山道中二首

幾月高堂闕問安歸塗不管上天難
誦君兩疊思親句
也信從來取友端

行盡江湘萬疊山
山猶在有無間
明朝漸喜登閩嶺
澗水分流響珮環

次韻擇之發紫溪有作

明日振衣十仞岡
夜分起看月和霜
久知行路難如此
不用悲歌淚滿裳

次韻別林擇之

暫時相別不須悲
楚調淒涼政爾為
幾曲清溪足相送
一天明月豈曾離
上堂嘉慶多為問
緣道風光少賦詩

更謝同袍二三子夜來幽夢滿春池

次韻別范伯崇二首

東歸亂
豪止此

平生罪我只春秋更作噉噉萬里遊
賴有吾人肯相伴
群譏衆詆不能憂

累月追隨今別離人生離合豈無時
願言更勵堅高志
力索窮探慰所思

有懷南軒老兄呈伯崇擇之二友二首

憶昔秋風裏尋盟湘水傍
勝遊朝挽袂妙語夜連床
別

去多遺恨歸來識大方惟應微密處猶欲細商量

積雨芳菲暗新晴始豁然園林媚幽獨窓戶愜清妍晤

語心何遠

謂日與擇之講論

書題意未宣

謂數收伯崇近書

懸知今夜

月同夢舞雩邊

九日登天湖以菊花須插滿頭歸分韻賦詩得

歸字

去歲瀟湘重九時滿城寒雨客思歸故山此日還佳節
黃菊清樽更晚暉短髮無多休落帽長風不斷且吹衣

相看下視人寰小祗合從今老翠微

歸報德再用前韻

幾枝藤竹醉相携何處千峰頂上歸正好臨風眺平楚
却須入谷避斜暉酒邊泉溜寒侵骨坐上嵐光翠染衣
踏月過橋驚易晚林垆回首更依微

雪中與林擇之祝弟登劉圃之宴坐巖有懷南
嶽舊遊賦此呈擇之屬和并寄敬夫兄

風雪集歲晏掩關聊自休今辰展遐眺倚此寒巖幽同

雲暗空室皓彩迷林丘崩奔小澗歇飛舞增綢繆仰看
鸞鶴翔俯視江漢流乾坤有奇變瀕洞鷺兩眸三酌不
自温倚杖空冥搜悲歌動華薄璀璨忽滿裘向來一杯
酒浩蕩千里遊亦復有茲賞微言寄清酬解携今幾許
光景逝不流懷人眇山嶽省已紛愆尤對此奇絕境一
懼生百憂茫然發孤詠遠思誰能收

考異

拜張魏公墓下

劍履

一作劍几

精忠

一作精誠

孤憤

一作忠憤

國威

一作國勢

敬簡堂分韻

齋扉

一作齋房

大雪馬上次韻

羽旄

一作羽化

馬上口占

歌酒

一作飲酒

烟村

一作前村

馬跡橋

生志

一作生意

高臺次韻

留清

一作流清

石廩峰

家家有廩高如許，大好人間快活年。

一云教人鎮作豐年，
願樂聖何妨萬億年。

林間殘雪

忽復空枝墮殘雪

一作忽聽水
條墮清響

福巖讀張湖南舊詩

白雲未屬分符客

一作今朝暫
豁平生意

奉別敬夫

要眇

一作
要妙

豈知

一作
豈無

淵乎齋

澹浮

一作
湛浮

雪梅

野橋

一作
斷橋

答林擇之四詩

家客

一作
家樂

再和油字韻

羽人

一作新詩

日定

一作日寄

觀西山

悠然

一作悠悠

進賢客舍

同行

一作同舟

山行至金步

悲重疊

一作傷
蘇邈

稅駕有期心轉迫

一作欲近慈
闡心轉切

晦庵集卷五